

Մայր Աթոռ Ս. Էջմիածին
Տեղեկատվական Համակարգ
Հեռ.: (374 1) 517 128/125
Հեռառիպ: (374 1) 517 301
Էլ-փոստ: holysce@etchmiadzin.am
Տնօրեն՝ Տ. Վահրամ քհն. Մելիքյան

ՀԱՂՈՐԴԱԳՐՈՒԹՅՈՒՆ
Oqnosunnuy 25, 2008թ.

Եպիսկոպոսական ձեռնադրություն Մայր Աթոռ Սր. Էջմիածնում

Օգոստոսի 24-ին Մայր Աթոռ Սուրբ Էջմիածնում հընթացս Սր. Պատարագի Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի ձեռամբ եպիսկոպոսական ձեռնադրություն և օծում ստացան ՀՀ Զինված ուժերի հոգևոր առաջնորդ Տ. Վրթանես վարդապետ Աբրահամյանը և Գևորգյան Հոգևոր Ճեմարանի տեսուչ Տ. Սահակ վարդապետ Մաշայանը: Սրբազան արարողության ընթացքին Վեհափառ Հայրապետի ընթերականերն էին Մայր Աթոռի դիվանապետ Տ. Արշակ եպիսկոպոս Խաչատրյանը և Երևանի Սր Գր. Լուսավորիչ մայր Եկեղեցու հոգևոր տեսուչ Տ. Անուշավան եպիսկոպոս Ժամկոչյանը: Ընծայացուների խարտավիլակն էր Մայր Աթոռի լուսարարապետ Տ. Արարատ եպիսկոպոս Գալթագճյանը:

Դեռևս օգոստոսի 23-ին, երեկոյան ժամերգությունից առաջ, Մայր Տաճարում Իջման Սր. Մեղանի առջև կատարվեց նրանց ուխտադրության կարգը, որի ընթացքում վարդապետները, Հայաստանյայց Առաքելական Սր. Եկեղեցուն և Մայր Աթոռ Սր. Էջմիածնին իրենց հավատարմության ուխտը կատարելով, ստորագրեցին երդմնագրերը:

Օգոստոսի 24-ին, Հայրապետական Սր Պատարագի ընթացքում, Սր. Ստեփանոս Նախասարկավագի խորանի առջև կատարվեց ընծայացուների հավատքի ուղղափառության քննությունը: Ձեռնադրվելիք եպիսկոպոսների մասին Վեհափառ Հայրապետին վկայեցին Հայ Եկեղեցու նվիրապետական աստիճանների ներկայացուցիչները՝ դպիրներ, կիսասարկավագներ, սարկավագներ, քահանաներ, եպիսկոպոսներ, ինչպես նաև ժողովրդը ներկայացնող աշխարհականներ:

Այնուհետև Սր. Պատարագը շարունակվեց Մայր Տաճարի Ավագ Խորանին: «Աստվածային և երկնային շնորհ» շարականի երգեցողության ներքո երկու վարդապետները, դառնալով դեպի հավատացյալ ժողովուրդը, վեր բարձրացրեցին իրենց ձեռքերը՝ ի նշան աշխարհից հրաժարման: Ապա Նորին Սրբությունն ընծայացուներին կոչեց եպիսկոպոսության և Սրբալույս Մյուռոնով օծեց նրանց ճակատներն ու աջ ձեռքերի բութ մատները: Ձեռնադրության արարողության ավարտին նորած եպիսկոպոսներին հանձնվեցին նաև եպիսկոպոսական իշխանության խորհրդանիշերը՝ եպիսկոպոսական գավազաններ և մատանիներ, ինչպես նաև ի նշան Աստծո խոսքի քարոզչության՝ Սր. Ավետարան:

Օծման ավարտին Ամենայն Հայոց Հայրապետն իր պատգամն ուղղեց նորած եպիսկոպոսներին: «Մենք հավատում ենք, որ պատասխանատվության բարձր գիտակցությամբ պիտի շարունակեն նրանք իրենց ծառայությունը՝ միշտ սերն ու հարգանքը վայելելով ինչպես իրենց ծառայակից եղբայրների, այնպես էլ՝ հավատավոր իրենց զավակների, որովհետև իրենց կյանքի ողջ ընթացքին նրանց երբեք չեն եղել քանքարաթաքույց, նրանք երբեք չեն փնտրել իրենց անձնական շահը, այլ միշտ ծառայական ոգով հետամուտ են եղել օգտակարություն բերելու հավատավոր իրենց զավակներին, պայծառացնելու և շենացնելու հայրորդու հոգին, նրա հոգևոր կյանքը և

Հայաստանյաց Առաքելական մեր Սուրբ Եկեղեցին»,- ասաց Նորին Սրբությունը: Վեհափառ Հայրապետը նկատեց, որ այսօր նրանք մեծագույն պատասխանատվություն են կրում իրենց ուսերին, ծառայության կոչված՝ մեկն իբրև տեսուչ Գևորգյան հոգևոր ճեմարանի, իսկ մյուսը՝ իբրև հոգևոր առաջնորդ Հայոց բանակի. նրանց խնամքին են հանձնված երիտասարդ հոգիներ, որոնց հոգևոր կյանքի ընթացքը կերտվելու է իրենց հոգածությամբ:

Հայոց Հայրապետն նաև իր գնահատանքը հայտնեց նորած եպիսկոպոսների ծնողներին՝ Հայոց Եկեղեցուն նվիրյալ ու հավատավոր սպասավորներ պարգևելու համար, ինչպես նաև ողջունեց ներկայությունը ՀՀ Պաշտպանության նախարար Սեյրան Օհանյանի և բարձրաստիճան գինվորականների:

Հավարտ Սբ. Պատարագի Մայր Աթոռում տեղի ունեցավ ընդունելություն, որի ընթացքում Հայոց Հայրապետը նորած Սրբազան Հայրերին նվիրեց եպիսկոպոսական պանակներ:

Ձեռնադրության արարողությանը ներկա էին Հայ Եկեղեցու թեմակալ առաջնորդներ, Մայր Աթոռի միաբաններ, ՀՀ Պաշտպանության նախարար Սեյրան Օհանյանը և մի շարք բարձրաստիճան գինվորականներ, Գևորգյան Հոգևոր ճեմարանի դասախոսներ և հյուրեր: Սբ. Պատարագին մասնակցում էր նաև Մայր Աթոռում պաշտոնական այցով գտնվող Եվրոպական Եկեղեցիների Կոնֆերանսի Գլխավոր քարտուղար Քոլին Վիլյամսի գլխավորած պատվիրակությունը:

Առաջիկա օրերին Վրթանես և Սահակ եպիսկոպոսները ուխտի պատարագներ կմատուցեն Մայր Տաճարում:

###

S. Վրթանես եպիսկոպոս Աբրահամյան

Ծնվել է 1962թ. մարտի 21-ին, Լեռնային Ղարաբաղի Մարտունու շրջանի Ծովատեղ գյուղում: Ավագանի անունն է Կամո:

1969-1979թթ. սովորել և ավարտել է տեղի միջնակարգ դպրոցը:

1980թ. ընդունվել է Մայր Աթոռ Ս. Էջմիածնի Գևորգյան Հոգևոր ճեմարան:

1981-1983թթ. ծառայել է սովետական բանակում: Ջորացրվելուց հետո շարունակել է ուսումը Հոգևոր ճեմարանում:

1987թ. դեկտեմբերի 25-ին՝ Ստեփանոս Նախավկայի տոնին, ձեռամբ Տ Հուսիկ արք. Սանթրոբյանի ձեռնադրվել է սարկավագ:

Ճեմարանում ուսումնառությունն ավարտելուց հետո աշխատանքի է նշանակվել Մայր Տաճարի թանգարանում:

1988թ. մարտի 10-ին պաշտպանել է ավարտաճառ «Աղվանից Եկեղեցու համառոտ պատմություն (Դ-ԺԷ դարեր)» թեմայով և արժանացել քաջալավ գնահատականի:

1988թ. մայիսի 22-ին՝ Հոգեգալստյան տոնին, ձեռամբ Տ Հուսիկ արք. Սանթրոբյանի ձեռնադրվել է կուսակրոն քահանա:

1989-1994թթ. ծառայել է Ամարասի վանքում որպես վանահայր:

1992թ. նոյեմբերին պաշտպանել է վարդապետական թեզ «Հովսեփ Արցախեցի՝ վահան ուղղափառության» թեմայով:

1994-1996թթ. եղել է Արցախի թեմի առաջնորդական փոխանորդ:

1996թ. հունիսին նշանակվել է Ս. Հռիփսիմե վանքի վանահայր:

1997-1999թթ. ծառայել է որպես ՀՀ Պաշտպանության նախարարի հոգևոր խորհրդատու:

1999-2001թթ. ծառայել է Ս. Հռիփսիմե վանքում որպես վանահայր:

2001թ. օգոստոսից հոգևոր հովվության է նշանակվել Գուգարաց թեմի Տավուշի մարզում:

2006թ. սեպտեմբերի 28-ից հոգևոր հովվության է նշանակվել Նոր Նախիջևանի և Ռուսաստանի Հայոց թեմում:

2007թ. հոկտեմբերի 1-ից նշանակվել է ՀՀ Զինված ուժերի հոգևոր առաջնորդ:

Գերաշնորհ Ս. Սահակ եպիսկոպոս Մաշալյան

Ծնվել է 1962 թ. Ստամբուլում (ավագանի անունը՝ Շահան):

1983 թ. հոգևոր սպասավորության է անցել Կ. Պոլսի հայոց Պատրիարքարանում:

1983-1987 թթ. սովորել է Ստամբուլի համալսարանի փիլիսոփայության բաժնում:

1986 թ. ձեռնադրվել է սարկավագ ձեռամբ Երանաշնորհ Ս. Շնորհք Պատրիարք Գալուստյանի:

1989-1994 թթ. աստվածաբանություն է ուսանել Լոնդոնի համալսարանում:

1992 թ. կուսակրոն քահանա է ձեռնադրվել ձեռամբ Երանաշնորհ Ս. Գարեգին Պատրիարք Գազանճյանի:

1994-1997 թթ. եղել է Երուսաղեմի հայոց Պատրիարքության Թարգմանչաց վարժարանի տեսուչը և կրոնի ուսուցիչը:

1997-1999 թթ. կրթությունը շարունակել է Գուբլինի համալսարանում (Իռլանդիա):

1999-2005 թթ. եղել է Կ. Պոլսի հայոց Պատրիարքության միջեկեղեցական և միջկրոնական հարաբերությունների բաժնի վարիչը, ինչպես նաև հոգևոր հովիվ Կ. Պոլսի հայոց եկեղեցիներում:

2005 թվականից Նոր Կտակարանի ներածություն և մեկնություն է դասավանդում Գևորգյան Հոգևոր Ճեմարանում և Վազգենյան Հոգևոր Դպրանոցում:

2006 թ. ապրիլի 21-ին Մայր Աթոռում վարդապետական թեզ է պաշտպանել «Հավատք և հրաշք» թեմայով և հաջորդ օրը Օշականի Ս. Մեսրոպ Մաշտոց եկեղեցում, ձեռամբ Գերաշնորհ Ս. Շահան արքեպս. Սվաճյանի, ստացել է մասնավոր վարդապետության չորս աստիճանները:

2007թ. դեկտեմբերին նշանակվել է Գևորգյան Հոգևոր Ճեմարանի տեսուչ:

###